



Minggu, 26 Maret 2023

**Ogen: Lukas 1:38**



**Erpengendes Man Tuhan**



**W***Ku endesken diringku man Tuhan. Janah jadilah i bas aku bagi si enggo ikatakenndu e.*" Enda perkatan Maria tupung ia ijumpai Malaikat Gabriel. Ikataken Malaikat e maka lanai ndekah Maria natang tuah, janah tuah e i bas Kesah Si Badia nari. Anak i bas bertin e badia ras igelari Anak Dibata. La ngasup Maria nimbak kai si ikataken malaikat e man bana amin pe mberat nge ngalokensa. Sempat nge isungkun Maria Malaikat Gabriel e, uga banci jadi si e man bana, sabap ia singuda-nguda denga. Nina malaikat e njababsa "la lit si metahat i bas Tuhan."

Pengendesen dirina man Tuhan nalukek kebiaren ras aru ate Maria. Aminna gia adi i bas peradaten lit nge kari resikona adi natang tuah lenga lit perbulangen. Tatapen jelma si enterem enggo me Maria e diberu si la terpake, mela nari nge akap oangtua ngidah anakna erlagu la mehuli, hubunenna ras Jusup pe banci nge rukrak sabap terdat Maria si la setia. Entah labo kari kalak tek adi kataken e anak si Badia. Erbage situhuna si jadi i bas pusuh Maria i bas ngaloken tanggungjabap si mbelin e, jadi nande man Jurselamat doni enda. Alu sederhana Maria rukur, adi Dibata si ngendesken dahin e, lit nge kari bahanNa si mehulina. Lenga ieteh Maria uga carana Diata erdahin i bas dirina saja tek ia labo icurnaken Dibata ia i bas ndahiken tanggungjabap e. Kerina resiko si kemungkinanen jadi i bas geluhna, iampekenna man Tuhan e maka ngasup ia ngerana, ...jadilah man bangku bagi si enggo ikatakenNa e."

Mereken diri guna ipake Tuhan e me persembahen si sehal ulina. Erbage perbeben si nandangi jadi enggo siap ngalokensa. Lit sada kiniteken maka Tuhan labo sinik adi kune lit perbeben sabap bekas persuruhanNa, IA ka si mereken serpang pulah.